

Danki na entreguismo di Gobierno Eman:

Caso di Eric y Alex Mansur te na aña 2000 den Corte

ORANJESTAD(AAN) Tres yiu di tera ta pega den exterior pa motibo cu Henny Eman y su gobierno entreguista a percura contra tur ley, normanan di decencia, honor y dignidad nacional, pa nan extradicion por a tuma lugar den pura.

Cu supuestu urgencia nacional primonan Mansur a ser poni riba avion special di autoridadnan Mericano rumbo pa Puerto Rico, pasobra bao di e capa cu ta Merca tabata pone presion y tabata tin pura pa hiba primonan Mansur dilanti di huez, cu masha muestra di poder Ministerio Publico di Aruba a pusha cu alma y cuerpo pa prome cu dia di Mama aña pasa primonan Mansur a ser poni riba avion pa Puerto Rico.

Despues autoridadnan Mericano y di Puerto Rico a bisa cu nan no tabata tin ningun pura cu e extradicion pasobra primonan Mansur por a bay Puerto Rico riba nan mes y na Puerto Rico nan no tabata compronde pakico for di Aruba mes tanto presion a ser poni pa extradita pri-

monan Mansur.

Te awe ni Henny ni cierto ministronan Hulandes no a contradeci loke autoridadnan Mericano a bisa encunto cu no tabata tin nada di urgencia grandi pa extradita primonan Mansur.

Bao di e capa cu ta Merca tabata tin tanto pura cu extradicion, tres Arubiano, Randy Habibe y Alex y Eric Mansur a ser nenga pa bringa nan caso den corte na un manera husto y haya e posibilidad pa bay den Casacion, manera cu instancianan hudicial halto na Hulanda mes a alerta gobierno Hulandes y Aruba riba dje.

Extradicion di primonan Mansur tabata nada otro cu un acto politico y e producto di e politica entreguista di Henny Eman kende ta bay na amen di tur loke cierto ministronan Hulandes (no pueblo Hulandes!) ta dicta pe y por algo sera!

E caso di Eric y Alex Mansur keto bay ta uno mal bruha pasobra no tin pruebanan

duro y e asunto di chequenar cu a ser manda pa Aruba ta mas ridiculo ainda, pasobra tin te hasta ministro na Aruba cu ta parcialmente doño di negoshi cu tambe a haya cheque di Puerto Rico y pa nan si no tin peticion pa extradicion?!

DIARIO su punto encunto extradicion keto bay ta keda sin excepcion; extradicion ta un muestra di debilidad y un muestra di no ta capaz pa ehecuta ley den bo mesun pais y cu extradicion ta un acto di entrega di autonomia pasobra paisnan manera Francia y Venezuela no ta extradita pa nada di mundo nan ciudadanonan.

Francia te hasta a nenga di extradita un Mericano kende ta worde acusa di a mata hende na Merca, pero na Aruba contra ley y contra tur derecho humano, e gobierno di Henny Eman si a extradita tres yiu di tera, di cual dos esta e Mansuran na Puerto Rico mester bolbe bay sinta warda te otro aña, posiblemente na Mei 2000 pa nan

caso po ser presenta den corte.

E famoso Speed Trail cu Henny Eman y su gobierno a papia di dje pa e tres Arubianonan cu a worde extradita tabata otro gañamento grandi cu pueblo di Aruba lamentablemente a custumbra di dje di Henny Eman y su gobierno entreguista.

Segun informacionnan haya di Puerto Rico, autoridadnan Mericano ta blo bisa cu e caso ta den "Discovery" y cu agentenan di FBI ta viahando pa diferente pais pa haci investigacion y busca informacion.

Si e caso ta den "Discovery" anto ta pakico Henny Eman y cierto ministronan Hulandes a pusha tanto pa extradita primonan Mansur?

No tabata tin ningun peligro di huymiento di primonan Mansur pasobra pa colmo Alex Mansur Junior tabata na Venezuela ora cu detencion pa cu extradicion a ser saca door di Ministerio Publico di Aruba y Alex Mansur a bolbe

Aruba cu e prome vuelo cu e por a haya pa entrega su mes na autoridadnan local.

Awe Primonan Mansur por tabata na Aruba wardando nan caso tuma lugar y pa e dia cu e caso enberdad ser presenta den corte na Puerto Rico nan por a bay pa atende esaki.

Cu awe primonan Mansur mester warda te aña dos mil pa kizas nan caso bin padilanti, ta nada otro cu culpa di Henny Eman su politica di entreguismo y tur responsabilidad pa loke ta pasando actualmente cu tardanza di e caso, ta cay directamente pe como e prome ministro entreguista den historia di pais Aruba.

Segun ultimo informacionnan, Hulanda lo ta poniendo presion riba Merca pa e caso ser trata lo mas rapido posibel, pero si Merca kier nan por wanta e caso pa cuanto aña cu nan ta haya ta bon y esaki ta loke gobierno di Aruba a logra cu su extradicion traicionero.

Imelda Hof den programa "Interes di Pueblo"

ORANJESTAD(AAN): Den e programa di Mr. Nilo Croes na Top FM, "Interes di Pueblo", awe lo trata Imeldahof cu ta celebrando su di 45 aña di existencia.

Lo trata su impacto den sociedad, y su plannan pa futuro.

Nunca por calcula e balor inmenso cu Imeldahof ta nifica pa Aruba y su pueblo y pa esaki mester sigui apoya y sostene tambe e institucion aki pa su trabao di gran balor y necesidad pa nos isla.

Awe sinembargo, e programa lo ta pa 8 or mainta, debi na actividadnan di carnaval.

**TELEFONNAN
DI DIARIO
826747
FAX
828551**

CARNAVAL TA PA TUR HENDE!!

